

古文辭類纂

第二函
第六冊

箴銘類

揚子雲州箴十二首

古文辭類纂六十

爾按子雲本傳云箴莫善於虞箴作州箴藝文志以州箴列於
儒家此本錄從藝文類聚別無善本蓋多舛誤子雲文尙奇詭
而趙充國頌及此文獨平易蓋箴頌之體宜爾也漢武帝元封
五年初置刺史部十三州晉書地志以冀幽并兗徐青揚荆豫
益涼及朔方交趾是爲十三部而田仁於天漢大始之間嘗刺
舉三河又在十三部之外其後征和四年置司隸校尉又其後
罷所領兵而使察三輔三河宏農於是無三河刺史而有司隸
是武帝時共十四部也昭帝初以河內屬冀州河東屬并州則
司隸但有二輔宏農河南其後成帝罷刺史置州牧哀帝始復
刺史而卒又改爲州牧焉司隸之官成帝時首哀帝時復然哀
帝雖復其官但屬大司空比於司直故本紀謂之正司直司隸
蓋自是佐三公舉朝廷不法者而已不復如成帝以前之督部
諸郡三輔也故自成帝省司隸後總爲十三部其時司隸所部
必分屬於豫涼二州矣但史言之不詳耳至平帝元始三年始
更十二州名分界郡國所屬其州名史亦不詳獨賴子雲是箴
而知之爾蓋設雍州以易涼州而朔方所部歸於并州而交趾
謂之交州王莽奏改州名云漢家十三州州名及界多不應經
此箴首必引禹貢所謂應經也平帝元始二年黃支國獻犀牛
其交州箴內亦述及焉然則其文必平帝時作當時王莽旣改
州名頗張其事蓋使人定爲地理之書今漢書地理志所本者
是也故地理志書戶口獨舉元始二年知其與州箴同時有也
志內每郡國必曰屬某州而三輔宏農河東武都隴西金城天

水十餘郡獨不著所屬此其舊書必曰屬雍州也班氏以雍州乃王莽專擅時所置之名故刊除之爾其實志內某郡屬某州大抵皆莽所定而漢平帝以前郡國分屬諸州之制莽所云不應經者皆不復可詳也自是迄莽之亡皆十二部建武中興改雍州爲司隸而復設。○
涼州乃復爲十三部

冀州牧箴

洋洋冀州鴻原大陸嶽陽是都嶷夷皮服滂浚河流夾以碣石三后攸降列爲侯伯降周之末趙魏是宅冀州麋沸炫沍如湯更盛更衰載縱載橫陪臣擅命天王是替趙魏相反秦拾其敝北築長城恢夏之場漢興定制改列藩王仰覽前世厥力孔多初安如山後崩如崖故治不忘亂安不忘危周宗自怙云焉有子隳六國奮矯渠絕其維牧臣司冀敢告在階

揚州牧箴

矯矯揚州江漢之滸彭蠡旣豬陽鳥攸處橘柚羽貝瑤琨滌滌聞

越北垠，沅湘攸往，獷矣淮夷，蠢蠢荆蠻，翩彼昭王，南征不旋，人咸
躓於垤，莫躓於山，咸跌於汙，莫跌於川，明哲不云我昭，童蒙不云
我昏，湯武聖而師伊呂，桀紂悖而誅逢干，蓋邇不可不察，遠不可
不親，靡有孝而逆父，罔有義而忘君，泰伯遜位，基吳紹類，夫差一
誤，泰伯無祚，周室不匡，句踐入霸，當周之隆，越裳重譯，春秋之末，
侯甸畔逆，元首不可不思，股肱不可不孳，堯崇屢省，舜盛欽謀，牧
臣司揚，敢告執籌。

荆州牧箴

幽幽巫山，在荆之陽，江漢朝宗，其流湯湯，夏君遭澤，荆衡是調，雲
夢塗泥，包匭菁茅，金玉砥礪，象齒元龜，貢篚百物，世世以饒，戰戰
慄慄，至桀荒溢，曰我在帝位，若天有日，不順庶國，孰敢予奪，亦有
成湯，果秉其鉞，放之南巢，號之以桀，南巢茫茫，包楚與荆，風慄以

悍氣銳以剛。有道後服。無道先強。世雖安平。無敢逸豫。牧臣司荆。敢告執御。

青州牧箴

茫茫青州。海岱是極。鹽鐵之地。鉛松怪石。羣水攸歸。萊夷作牧。貢篚以時。莫怠莫違。昔在文武。封呂於齊。厥土塗泥。在邱之營。五侯九伯。是討是征。馬殆其銜。御失其度。周室荒亂。小白以霸。諸侯僉服。復尊京師。小白既沒。周卒陵遲。嗟茲天王。附命下土。失其法度。喪其文武。牧臣司青。敢告執矩。

徐州牧箴

海岱伊淮。東海是渚。徐州之士。邑於海宇。大野既瀦。有羽有蒙。孤桐蠙珠。泗沂攸同。實列藩蔽。侯衛東方。民好農蠶。大野以康。帝癸及辛。不祇不恪。沈湎于酒。而忘其東。作天命湯武。勦絕其緒。祚降

周任姜。鎮於琅琊。姜氏絕苗。田氏攸都。事由細微。不慮不圖。禍如邱山。本在萌芽。牧臣司徐。敢告僕夫。

兗州牧箴

悠悠濟河。兗州之寓。九河既道。雷夏攸處。草籙木條。漆絲絺紵。濟潔既通。降邱宅土。成湯五徙。卒都於亳。盤庚北渡。牧野是宅。丁感雝雉。祖已伊忠。爰正厥事。遂緒高宗。厥後陵遲。顛覆厥緒。西伯戡黎。祖伊奔走。致天威命。不恐不震。婦言是用。牝雞是晨。三仁既知。武果戎殷。牧野之禽。豈復能耽。甲子之朝。豈復能笑。有國雖久。必畏天咎。有民雖長。必懼人殃。箕子欷歔。厥居爲墟。牧臣司兗。敢告執書。

豫州牧箴

郁郁荆山。伊雒是經。榮播泉漆。惟用攸成。田田相擎。廬廬相距。夏

殷不都成周攸處。豫野所居。爰在鶉墟。四隩咸宅。寓內莫如。陪臣
執命。不慮不圖。王室陵遲。喪其爪牙。靡哲靡聖。捐失其正。方伯不
維。韓卒擅命。文武孔純。至厲作昏。成康孔寧。至幽作傾。故有天下
者。毋曰我大。莫或余敗。毋曰我強。靡克余亡。夏宅九州。至於季世。
放於南巢。成康太平。降及周微。帶蔽屏營。屏營不起。施於孫子。至
赧爲極。實絕周祀。牧臣司豫。敢告柱史。

雍州牧箴

黑水西河。橫截崑崙。邪指閭闔。畫爲雍垠。上侵積石。下礙龍門。自
彼氐羌。莫敢不來庭。莫敢不來匡。每在季主。常失厥緒。侯紀不貢。
荒侵其宇。陵遲衰微。秦據以戾。興兵山東。六國顛沛。上帝不寧。命
漢作京。隴山以徂。列爲西荒。南排勁越。北啟彊胡。并連屬國。一護
攸都。蓋安不忘危。盛不諱衰。牧臣司雍。敢告綴衣。

益州牧箴

巖巖岷山古曰梁州華陽西極黑水南流茫茫洪波鯀堙降陸於
時八都厥民不隩禹導江沱岷嶓啟乾遠近底貢磬錯砮丹絲麻
條暢有稷有稻自京徂畛民攸溫飽帝有桀紂涵沈頗僻遏絕苗
民滅夏殷績爰周受命復古之常幽厲夷業破絕爲荒秦作無道
三方潰叛義兵征暴遂國於漢拓開疆宇恢梁之野列爲十二光
羨虞夏牧臣司梁是職是圖經營盛衰敢告士夫

幽州牧箴

蕩蕩平川惟冀之別北阨幽州戎夏交逼伊昔唐虞實爲平陸周
末薦臻迫於獯鬻晉失其陪周使不徂六國擅權燕趙本都東限
獫狁羨及東胡強秦北排蒙公城墻大漢初定介狄之荒元戎屢
征如風之騰義兵涉漠偃我邊萌既定且康復古虞唐盛不可不

圖衰不可或忘隄潰蟻穴器漏鍼芒牧臣司幽敢告侍旁

并州牧箴

雍別朔方河水悠悠北辟獯鬻南界涇流畫茲朔土正直幽方自昔何爲莫敢不來貢莫敢不來王周穆遐征犬戎不享爰貊伊德侵玩上國宣王命將攘之涇北宗周罔職日用爽蹉旣不俎豆又不干戈犬戎作難斃於驪阿太上曜德其次曜兵德兵俱顛靡不悴荒牧臣司并敢告執綱

交州牧箴

交州荒裔水與天際越裳是南荒國之外爰自開闢不羈不絆周公攝祚白雉是獻昭王陵遲周室是亂越裳絕貢荆楚逆叛四國內侵蠶食周宗臻於季赧遂入滅亡大漢受命中國兼該南海之宇聖武是恢稍稍受羈遂臻黃支杭海三萬來牽其犀盛不可不

憂隆不可不懼顧瞻陵遲而忘其規摹亡國多逸豫而存國多難
泉竭中虛池竭瀕乾牧臣司交敢告執憲

揚子雲酒箴

予猶瓶矣觀瓶之居居井之肩處高臨深動常近危酒醪不入口
藏水滿懷不得左右牽於繆徽一旦夷礙爲嘗所輻身提黃泉骨
肉爲泥自用如此不如鴟夷鴟夷滑稽腹如大壺盡日盛酒人復
借酤常爲國器託於屬車出入兩宮經營公家繇是言之酒何過
乎

崔子玉座右銘

無道人之短無說己之長施人慎勿念受施慎勿忘世譽不足慕
唯仁爲紀綱隱心而後動謗議庸何傷勿使名過實守愚聖所臧
在涅貴不淄曖曖內含光柔弱生之徒老氏戒剛強行行鄙夫志

悠悠故難量。慎言節飲食。知足勝不祥。行之苟有恆。久久自芬芳。

張孟陽劔閣銘。

巖巖梁山積石峨峨。遠屬荆衡。近綴岷嶓。南通邛夔。北達褒斜。狹
過彭碣。高踰嵩華。惟蜀之門。作固作鎮。是曰劔閣。壁立千仞。窮地
之險。極路之峻。世濁則逆。道清斯順。閉由往漢。開自有晉。秦得百
二。并吞諸侯。齊得十二。田隄忒壽。矧茲狹隘。主之外區。一人荷戟。
萬夫趨赴。形勝之地。匪天夷居。昔在武侯。中流而喜。山河之固。見
屈吳起。興實在德。險亦難恃。洞庭孟門。三國不祀。自古迄今。天命
不易。憑阻作昏。鮮不敗績。公孫旣滅。劉氏銜璧。覆車之軌。無或重
跡。勒銘山阿。敢告梁益。

韓退之五箴

并序。

交頰告燔臚

人患不知其過。旣知之不能改。是無勇也。余生三十有八年。髮之

短者日益白齒之搖者日益脫聰明不及於前時道德日負於初心其不至於君子而卒爲小人也昭昭矣作五箴以訟其惡云

游箴

余少之時將求多能早夜以孜孜余今之時旣飽而嬉蚤夜以無爲嗚呼余乎其無知乎君子之棄而小人之歸乎

言箴

不知言之人烏可與言知言之人默焉而其意已傳幕中之辨人反以汝爲叛臺中之評人反以汝爲傾汝不懲邪而呶呶以害其生邪

行箴

行與義乖言與法違後雖無害汝可以悔行也無邪言也無頗死而不死汝悔而何宜悔而休汝惡曷瘳宜休而悔汝善安在悔不

可追悔不可爲思而斯得汝則勿思

好惡箴

無善而好，不觀其道，無悖而惡，不詳其故。前之所好，今見其尤，從也爲比，捨也爲讐。前之所惡，今見其臧，從也爲愧，捨也爲狂。維讐維比，維狂維愧，於身不祥，於德不義。不義不祥，維惡之大，幾如是爲而不顛沛，齒之尙少，庸有不思。今其老矣，不愼胡爲。

知名箴

內不足者，急於人知，霈焉有餘，厥聞四馳。今日告汝，知名之法，勿病無聞，病其曄曄。昔者子路，唯恐有聞，赫然千載，德譽愈尊。矜汝文章，負汝言語，乘人不能，拚以自取。汝非其父，汝非其師，不請而教，誰云不欺。欺以賈憎，拚以媒怨，汝曾不悟，以及於難。小人在辱，亦克知悔，及其旣寧，終莫能戒。旣出汝心，又銘汝前，汝如不顧，禍

亦宜然

李習之行已箴。

人之愛我。我度於義。義則爲朋。否則爲利。人之惡我。我思其由。過
寧不改。否又何仇。仇實生怨。利實害德。我如不思。乃陷於惑。內省
不足。愧形於顏。中心無他。曷畏多言。惟咎在躬。若市於戮。慢虐自
他。匪汝之辱。昔者君子。惟禮是持。自小及大。曷莫從斯。苟遠於此。
其何不爲。事之在人。昧者亦知。遷焉及已。則莫之思。造次不戒。禍
焉可期。書之在側。以爲我師。

張子西銘。

乾稱父。坤稱母。予茲藐焉。乃混然中處。故天地之塞。吾其體。天地
之帥。吾其性。民吾同胞。物吾與也。大君者。吾父母宗子。其大臣。宗
子之家相也。尊高年。所以長其長。慈孤弱。所以幼其幼。聖其合德。

賢其秀也。凡天下疲癯殘疾，憚獨鰥寡，皆吾兄弟之顛連而無告者也。于時保之子之翼也，樂且不憂，純乎孝者也。違曰悖德，害仁曰賊，濟惡者不才，其踐形惟肖者也。知化則善述其事，窮神則善繼其志，不愧屋漏爲無忝，存心養性爲匪懈，惡旨酒，崇伯子之顧養，育英才，潁封人之錫類，不弛勞而底豫，舜其功也。無所逃而待烹，申生其恭也。體其受而歸全者，參乎。勇於從而順令者，伯奇也。富貴福澤，將厚吾之生也。貧賤憂戚，庸玉汝於成也。存吾順事，沒吾寧也。

蘇子瞻徐州蓮華漏銘。

故龍圖閣直學士禮部侍郎燕公肅以創物之智聞於天下，作蓮華漏，世服其精。凡公所臨必爲之，今州郡往往而在。雖有巧者莫能損益，而徐州獨用瞽人衛朴所造，廢法而任意，有壺而無箭，自

以無目而廢天下之視使守者伺其滿則決之而更注人莫不笑之國子博士傅君勱公之外曾孫得其法爲詳其通守是邦也實始改作而請銘於軾銘曰

人之所信者手足耳目也目識多寡手知重輕然人未有以手量而目計者必付之度量與權衡豈不自信而信物蓋以爲無意無我然後得萬物之情故天地之寒暑日月之晦明崑崙旁薄於三十八萬七千里之外而不能逃於三尺之箭五斗之瓶雖疾雷轟風雨雪晝晦而遲速有度不加虧贏使凡爲吏者如瓶之受水不過其量如水之浮箭不失其平如箭之升降也視時之上下降不爲辱升不爲榮則民將靡然而心服而寄我以死生矣

蘇子瞻九成臺銘。

韶陽太守狄咸新作九成臺玉局散吏蘇軾爲之銘曰自秦并天

下滅禮樂韶之不作蓋千三百二十有三年其器存其人亡則韶
既已隱矣而況於人器兩亡而不傳雖然韶則亡矣而有不亡者
存蓋嘗與日月寒暑晦明風雨並行於天地之間世無南郭子綦
則耳未嘗聞地籟也而況得聞天籟使耳聞天籟則凡有形有聲
者皆吾羽旄干戚管磬匏絃嘗試與子登夫韶石之上舜峰之下
望蒼梧之眇莽九疑之聯綿覽觀江山之吐吞草木之俯仰鳥獸
之鳴號眾竅之呼吸往來唱和非有度數而均節自成者非韶之
大全乎上方立極以安天下人和而氣應氣應而樂作則夫所謂
簫韶九成來鳳鳥而舞百獸者既已燦然畢陳於前矣

古文辭類纂六十